

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoa: Nafatali Falealii, FS
Teutupe: Fiasili Puni E. Haleck, TK



Ekalesia Fa'apopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: <https://efkasonline.org>

Ofisa a le Failautusi Aoa, EFKAS

Mati 20, 2020

Susuga i Toeiina ma Faafeagaiga,
Susuga i Faifeau ma A'oa'o,
Afioga i Tiakono,
Le nofo i Matagaluega ma Pulega,
Mamalu o le Ekalesia Aoa EFKAS

FA'AALIGA FAALAU'ITELE MO LE EFKAS ONA O LE CORONAVIRUS (COVID-19)

Ekalesia e,

E ofo alofa atu i le suafa manumalo a lo tatou Alii o Iesu Keriso; le paia maualuga i susuga i Toeiina ma outou Faletua, susuga i Faafeagaiga ma outou Faletua, le mamalu o le 'aufaigaluega i susuga i Faifeau ma A'oa'o ma o outou Faletua, afioga i Tiakono ma outou Faletua, le mamalu i le nofo a Matagaluega, o Pulega, tainane le pa'ia lasilasi o 'aulotu ta'itasi o le EFKAS. E le galo foi fanau o le Ekalesia o loo fa'afalelmalu ai i atunuu e mamao ona o le misiona a le EFKAS; susuga i Faifeau Misionare ma outou Faletua, tainane le mamalu o 'aulotu misionare. Soifua manuia ma le lagi e mamā i le alofa ma le agalelei o le Atua!

E le toe po malaē i lo outou silafia, le fa'ama'i tūgā o loo vevesi ma mafatia ai nei le lalolagi – le COVID-19, poo le "Coronavirus." Tele soifua ua fa'amaumauina. Tele atunu'u ua afaina. Ae ua a'afia ai foi le tele o nofoaga o loo 'aumau ma galulue ai 'aulotu a le EFKAS, aemaise i atunuu i fafo.

E le o moenoa le Laulauafono ma le Komiti a Tamā o le Ekalesia i Samoa nei i atugaluga o loo mafatia ai nei 'aulotu ma tagata lotu o le EFKAS ona o leni fa'ama'i tūgā. Ma, o le ala lea ua saunia ai leni fa'aaliga fa'alau'itele. E le gata o se tali aloa'ia lea a le Ekalesia e tusa ai ma leni fa'ama'i, a o se ta'ita'itama foi e mafai ona mulimulita'i ai 'aulotu uma i le faatinoina o tiute fa'ale-Ekalesia, a o fa'amalumalu mai i o tatou luga leni fa'ama'i faigata.

Sa soalaupule fa'atasi le Laulauafono ma le Komiti o Tamā a le Ekalesia i Samoa nei i le tu'u fa'atasia o leni fa'aaliga. Ma, o le agaga maualuga sa fulisia i finagalo, o le naunau ina ia puipuia le soifua o tagata lotu o le EFKAS mai leni fa'ama'i faigata.

I le ava tele ma le fa'aaloalo, e tu'uina atu ai leni fa'aaliga fa'alau'itele mo 'aulotu uma o le EFKAS:

#1. Ia sapaapaia lapataiga a Faigamalo ma Matagaluega o le Soifua Maloloina:

Ia usita'ia lapataiga ua tu'uina atu e le Faigamalo ma Matagaluega o le Soifua Maloloina o loo aumau ai 'aulotu uma o le EFKAS. O ia lapataiga fa'alau'itele e mo le nofo puipuia o tagata mai leni fa'ama'i, e aofia ai: ia fufulu lelei lima i taimi uma, ia fa'aitiitia le fa'atalofa o lima ma le feāsogi, ia tau mamao le fesootaiga mai i isi tagata (*social distancing*), ia fa'amamā lou lotoifale, ia vavao le potopoto fa'atasi o tagata e to'atele i le mea e tasi, fa'atasi ai ma isi lapataiga e mafai ona maua mai i le *World Health Organization (WHO)*, o le *Center for Disease Control and Prevention (CDC)*, faapea Matagaluega o le Soifua Maloloina i lou lava lotoifale.

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoao: Nafatali Falealii, FS
Teutupe: Fiasili Puni E. Haleck, TK



Ekalesia Fa'apopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: <https://efkasonline.org>

#2. Lapataiga mo 'aulotu EFKAS i Amerika, Niu Sila, ma Ausetalia:

Talu ai le to'atele o tagata i Amerika, Niu Sila, ma Ausetalia ua aafia ma pesia i lenei fa'ama'i, e fautuaina lapataiga ia mo 'aulotu uma o le EFKAS o loo 'aumau i ia atunuu:

- Ia taofia sauniga lotu o le vaiaso, fa'apea sauniga masani o le Aso Sa.
- Ia taofia le faia o Aoga Aso Sa, o Mafutaga fa'ale-Ekalesia, o 'Aufaipese, o Fonotaga a 'Aulotu, o Fono a Pulega, Fono a Matagaluega, ma isi potopotoga e masani ai le Ekalesia. A mafai ona fa'aaogā ala o fesootaiga fa'anei-ona-po e fesootai ai, ua lelei lea. A o le agaga o le lapataiga, ina ia taofia le potopoto fa'atasi o tagata, ona e pepesi ma salalau gofie ai le fa'ama'i.
- Mo sauniga lotu i le Aso Sa, e fautuaina le faia o faiga lotu a le aiga lava ia. E manaia le tulaga ua faia nei e isi 'aulotu, o le faia o sauniga lotu i luga o le upega tafailagi, ae maimoa tapua'i mai ai tagata lotu mai o latou maota ma laoa.
- E fautuaina le asiasi pea o le faifeau i tagata lotu, ae faia lea i luga o le telefoni poo se isi 'auala o feso'otaiga fa'anei-ona-po. E mana'omia e tagata lotu le upu fa'amafanafana mai le 'aufaigaluega, aeamaie i lenei vaitau o le lē mautonu ona o le fa'amata'u mai o lenei fa'ama'i.

#3. Lapataiga mo 'aulotu EFKAS i Amerika Samoa:

I le taimi nei, e le o aafia se tasi i Amerika Samoa i lenei fa'ama'i. Peita'i, ina ia aloa'ia le poloa'iga ua tu'uina mai e le Kovana ma le faigamalo o Amerika Samoa (*code blue*), e fautuaina lapataiga nei mo 'aulotu uma o le EFKAS i Amerika Samoa:

- Mo le taimi nei, e fautuaina le faia o le sauniga e tasi i le Aso Sa, ae taofia le faia o isi sauniga masani o le vaiaso. Ia fa'amamā lelei le malumalu e faia ai le sauniga. Ia saunia ni *hand-sanitizers* e fa'amamā lelei ai 'aao o tagata lotu, ma ia fa'aitiitia le faatalofa o 'aao ma le feāsogi.
- O le taimi e aafia ai se tasi i Amerika Samoa i le fa'ama'i, ona fautuaina lea le o taofia o le sauniga i le Aso Sa, ae fa'amalosia le faia o faigalotu a le aiga lava ia i maota ma laoa (*code yellow*).
- I le taimi nei, ia taofia le faia o Aoga Aso Sa, o Aoga Samoa, o Mafutaga fa'ale-Ekalesia, o 'Aufaipese, o fonotaga a 'Aulotu, o Fono a Pulega, Fono a Matagaluega, ma isi potopotoga e masani ai le Ekalesia. A mafai ona fa'aaogā ala o fesootaiga fa'anei-ona-po e fesootai ai, ua lelei lea. A o le agaga o le lapataiga, ia taofia le potopoto fa'atasi o tagata, ona e pepesi ma salalau gofie ai le fa'ama'i.
- E fautuaina le asiasi pea o le faifeau i tagata lotu, ae faia lea i luga o le telefoni poo se isi 'auala o feso'otaiga fa'anei-ona-po. E mana'omia e tagata lotu le upu fa'amafanafana mai le 'aufaigaluega, aeamaie i lenei vaitau o le lē mautonu ona o le fa'amata'u mai o lenei fa'ama'i.

#4. Sauniga o Maliu, Fa'aipoipoga, Talagā Teu, Saofa'i, ma isi sauniga fa'apitoo:

E tu'u atu i le fa'autautaga a le Faifeau le fa'atinoina o nei sauniga fa'apitoo. Ia manatua, e le tatau ona silia ma le 10 tagata e mafuta faatasi i se mea e tasi. E tatau i le Faifeau ona fautuaina 'aiga, ia fai se faiga ina ia fa'apuupuu ai le sauniga, e laveaiina ai tagata o le a potopoto ma 'auai mai, mai le pepesi o le fa'ama'i.

#5. Aso Anapogi a le EFKAS – Aso Lulu

Ua fa'atulagaina le Aso Lulu o vaiaso ta'itasi, amata atu i le aso 25 o Mati, e fai ma Aso Anapogi a le EFKAS ona o lenei fa'ama'i faigata; e amata i le 6:00am i le taeao, ae tatala i le 12:00pm i le aoauli. O le upu moni lava, ua iso le potu ma le atamai faaletagata e saili se fofō o lenei fa'ama'i. Peita'i, na o le Atua e maua ai le fofō. E fautuaina ai le Ekalesia Aoao e tatou te tatalo ma anapopogi fa'atasi i Aso Lulu ta'itasi, e le gata e talosia ai i latou ua afaina ona o lenei fa'ama'i, ae fa'atagisia ai foi le fesoasoani mai o le Atua i alii ma tamaita'i foma'i ina ia vave ona maua se fofō e fo'ia ai lenei fa'ama'i.

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoao: Nafatali Falealii, FS
Teutupe: Fiasili Puni E. Haleck, TK



Ekalesia Fa'apotopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: <https://efkasonline.org>

#6. Mati 29 – Aso Sa fa'ailogaina o Ekalesia So'o-Fa'atasi i Amerika Samoa

O le Aso Sa, Mati 29, ua fa'atulaga e Ekalesia So'o-Fa'atasi i Amerika Samoa (*National Council of Churches in American Samoa*) e fai ma aso fa'ailogaina e tapua'i uma ai Ekalesia mo le saogalemu o le lalolagi, aemaise o Amerika Samoa, mai le fa'ama'i o le coronavirus. E le faia se sauniga e aofa'i fa'atasi ai Ekalesia So'o-Fa'atasi e pei ona masani ai. Ae fautuaina Ekalesia uma o loo fai ma totino o lenei fa'apotopotoga, e aofia ai mai le EFKAS, ina ia manatua ma talosia lenei fa'amoemoe i le Aso Sa, Mati 29, i taimi o a outou sauniga ma faigalotu.

#7. Aso Anapogi a Ekalesia Soo-Faatasi i Amerika Samoa

E le gata i le Aso Sa fa'ailogaina, ae ua fa'atulaga foi e Ekalesia So'o-Fa'atasi le aso fa'ailogaina o le vaiaso e tatalo ma anapogi ai Ekalesia uma e talosia ai le lalolagi ona o lenei fa'ama'i. O le a faia lea i Aso Faraile ta'itasi, mai le 6:00am i le taeao e oo atu i le 12:00pm i le aoauli.

#8. Fono Tele XXXIII ia Iulai 2020

O le a toe fa'aoo atu se isi fa'aaliga i se taimi lata mai nei, e fa'ailo ai tulaga o le Fono Tele ia Iulai 2020 pe fa'ataunuaina pe leai.


Ia lima ta'ita'iina e le Atua Lana Ekalesia i lenei vaitau o le Leni ua tatou i ai a o faamalumu mai lenei fa'ama'i faigata. Ia puipui e le Atua lo outou soifua ma si o matou ola faatauva.


Ua saunia lenei fa'aaliga e le Lauaufono o le Fono Tele ma le Laulau o le Komiti a le 'Au Toeaina.

Soifua,

Lauaufono Fono Tele



Fa'aeteete Saifoloi FT
Ta'ita'ifono EFKAS



Leatulagi Fa'alevao FT
Sui Ta'ita'ifono EFKAS


Fiasili Puni E. Haleck TK
Teutupe Aoao EFKAS


Nafatali Falealii FS
Failautusi Aoao EFKAS

Laulau Komiti a le 'Au Toeaina


Fiti Aofia FT
Ta'ita'ifono KAT


Leatulagi Fa'alevao FT
Failautusi KAT